

Mester haya mas garantia di presencia di Coastal na Aruba

AWE TARDI MINISTRO PRESIDENTE TA REUNI CU OSCAR WYATT JR.

ORANJESTAD(AAN) -- Awe tardi lo tuma lugar un interesante reunion entre Ministro Presidente mr. Eman y Oscar Wyatt Jr. di Coastal.

Den e reunion aki, e mandatario lo kier haya sa kico realmente ta Coastal su contribucion na desaroyo di pariba di brug muy en particular San Nicolas.

Ministro Presidente a indica cu Wyatt Jr. a haci hopi campaña cu tin 350 Mil Dollar pa e stadion di San Nicolas y gobierno entre otro kier sa si e placa aki realmente tey.

Un punto importante cu lo worde discuti ta e caminda cu gobierno tin planca cu tin cu pasa door di tereno di Coastal pa conecta e dos partinan di San Nicolas esta Seroc Colorado cu centro di San Nicolas. Gobierno kier tin e caminda mas pronto posibel pa asina por haci uso di e terenonan na Seroc Colorado tanto pa vivienda como deporte.

Ministro Presidente a muestra cu gobierno ta casi cla pa

tuma e decisionnan definitivo ariba Seroc Colorado y esey naturalmente ta depende di e valor di e terenonan y tambe di e entrada cu tin. Segun e mandatario, si corta hopi di e desviacionnan pa bay Seroc Colorado, e valor di e terenonan lo subi.

Gobierno tambe lo papia ariba e centro deportivo na San Nicolas cu ta cera.

Un otro punto cu lo papia cu Wyatt Jr. ta pa facilita "fuel" mas barata na WEB.

Den e reunion tambe lo papia ariba e pompnan di gasoline cu Coastal a tuma over, con esakinan ta bayendo.

Tambe tin pendiente e discusion ariba e tankinan na waf di Playa.

Gobierno tambe kier bay haci algo ariba e contract cu Coastal.

Ministro Presidente a muestra cu e contract cu gobierno anterior a cera cu Coastal, si studa esaki bon, ta duna e impresion cu esaki ta pa un periodo di 5 aña.



E contract ta muestra cu despues di 5 aña, Coastal facilmente por bay for Aruba.

E mandatario ta kere cu mester purba formula un acuerdo nobo cu ta duna Aruba mas garantia cu e actividadnan di Coastal lo keda, pa Aruba no worde sorpresa di un dia pa otro cu diripiente no tin un refineria atrobe.

Ministro Presidente a keda di informa prensa con e reunion aki a bay.

Ministro Tico Croes

E AÑA AKI LO HABRI 11 DESTINACION NOBO PA ARUBA

Turismo lo bay crece enormemente

ORANJESTAD(AAN) -- E aña aki turismo na Aruba lo conoce un crecimiento enorme. Asina e Ministro di Turismo, Tico Croes, a duna di conoce durante e conferencia di prensa di gobierno.

E mandatario a indica cu cifranan ta muestra cu e aña aki a cuminsa hopi bon. Pa loke ta trata e cantidad di turista cu ta bishita e isla, na Januari 1996 a registra un aumento di 4.6% mientras cu na Februari esaki tabata 6.2%.

Recientemente Ministro Croes a haci un viahe pa Europa caminda a bay concentra ariba e promocion di Aruba como destinacion turistico.

E mandatario a muestra cu na Europa por a constata mercadonan cu nunca el a conoce. E ta haya cu e mercado di Sur Europa ta hopi potencial pa Aruba.

Pa loke ta trata e vision di


Ministro Croes pa cu 1996, el a muestra cu e aña aki por spera vuelonan di diferente destinacion nobo. El a muestra cu otro luna caba lo cuminsa ripara vuelonan nobo.

Otro luna tambe lo bin un delegacion grandi di Moscu cu ta interesa pa cuminsa vuelonan via Europa pa Aruba.

E mandatario tambe a muestra e cantidad di promocion cu Aruba ta hayando den exterior y cu e campaña di mercadeo cu a hiba ta dunando resultadonan hopi positivo.

Rafael Estrada a keda apunta como e persona cu lo bay encarga su mes cu turismo na Europa. E mandatario ta haya cu Aruba lo bay haya masha hopi turista di Europa y cu esaki ta gracias na e maneho dinamico di gobierno cu ta propaganda Aruba como e destinacion turistico di Caribe.

SOSPECHOSO A KEDA DEN!!!



PA COMPRA
Y BENTA DI
BO AUTO !

TA UN
ADRES
TIN

SKINA AVICENASTRAAT
CU DE LA SALLESTRAAT
BANDA DI 916

PUNTRA PA EDDY PA
MIH OEA!

TEL: 38487